

Vizita e Fortlumenturisë së Tij, Kryepeshkopit Joan në Kavajë



Në një atmosferë të ngrohtë shpirtërore dhe mikpritjeje të veçantë, komuniteti orthodhoks i Kavajës priti sot vizitën e Kryebariut, Fortlumenturisë së Tij, Kryepeshkopit të Tiranës, Durrësit dhe gjithë Shqipërisë, z. Joan.

Liturgjia Hyjnore në Kishën e Shën e Premtes – Fshati Çetë

Dita nisi me kremtimin e Liturgjisë Hyjnore në Kishën e Shën e Premtes në fshatin Çetë, në nder të Dëshmores së Madhe Shën e Premte. Besimtarë nga zona dhe më gjerë u mbledhën për të marrë pjesë në këtë ngjarje të rrallë, ku Fortlumenturia drejtoi shërbesën së bashku me klerikë të zonës.

Në predikimin e Tij të thellë shpirtëror, ndër të tjera, Kryepeshkopi theksoi: “Shën e Premtja nuk dëshmoi vetëm me fjalë, por me jetën dhe gjakun e saj dashurinë për Krishtin... ajo na fton të mos kemi frikë të dëshmojmë Krishtin në jetën tonë të përditshme – me pastërti, me dashuri dhe me qëndrueshmëri në të vërtetën e Ungjillit.”

Në përfundim të Liturgjisë, Ikonom Stavrofor Atë Petro Thanasi mbajti një fjalë përshëndetëse, duke falënderuar Fortlumenturinë për praninë dhe kujdesin baritor

ndaj besimtarëve të kësaj treve.

Vizita në Kishën e Shën Nikollës – Qyteti i Kavajës

Pas Liturgjisë, Fortlumturia vizitoi Kishën e Shën Nikollës në qytetin e Kavajës. Në ambjentet e saj u zhvillua një takim i përzemërt me Kryetarin e Bashkisë së Kavajës, z. Fisnik Qosja, ku u theksua rëndësia e bashkëpunimit të shëndetshëm mes Kishës dhe autoriteteve vendore në shërbim të komunitetit.

Vizita në Muzeun Etnografik të qytetit

Në vazhdim, Kryepeshkopi Joan, i shoqëruar nga z. Qosja dhe përfaqësues të Kishës vendore, vizitoi Muzeun Etnografik të Kavajës, ku u njoh nga afër me trashëgiminë historike dhe kulturore të kësaj treve. Ai vlerësoi ruajtjen e identitetit kulturor si një urë që lidh brezat dhe forcon kujtesën shpirtërore të popullit.

Dreka nderi në prani të komunitetit.

Në përmbyllje të vizitës, u organizua një drekë nderi në ambient familjar dhe miqësor, ku morën pjesë përfaqësues të pushtetit lokal, klerikë, intelektualë, biznesmenë dhe besimtarë të thjeshtë. Në këtë tryezë të përbashkët u ndanë falënderime dhe u përcollën mesazhe bashkimi, mirënjohjeje dhe frymëzimi për të ardhmen.

Kjo vizitë e Fortlumturisë së Tij përbën një ngjarje të rëndësishme për jetën shpirtërore të qytetit dhe rrethinës së Kavajës, si dëshmi e kujdesit baritor dhe e forcimit të lidhjes së gjallë midis Bariut dhe grigjës së tij.

Përgatiti për Radio Ngjallja z. Harallamb Tereziu, pedagog pranë Akademisë Teologjike në Shën Vlash të Durrësit.

[Radio “Ngjallja”](#)